

愚

齋

存

稿

愚齋存彙卷第四十二目錄

電報十九

福州善將軍來電

濟南袁慰帥來電

寄天津李中堂

寄西安端午帥

寄福州許制台善將軍

寄保定廷護院

寄東京李星使

東京李星使來電

寄保定榮中堂

大沽李中堂來電

寄俄京楊星使

寄俄京楊星使轉電德京呂星使

東京李星使來電

福州善將軍來電

寄西安端中丞

寄北京慶親王天津李中堂保定榮中堂各省將軍督

撫帥

寄天津李中堂江鄂劉張兩帥

東撫袁慰帥來電

江督劉峴帥來電

陝撫端午帥來電

寄東京李星使

寄俄京楊星使

寄福州善將軍

寄東撫袁慰帥

寄天津李中堂

太原王中堂來電

寄東京李星使

愚齋存彙

卷四十二目錄

二

是種樓夢

東撫袁慰帥來電

又

江督劉峴帥來電

鄂督張香帥來電

寄天津李中堂江督劉峴帥鄂督張香帥皖撫王灼帥
東撫袁慰帥成都綽將軍奎樂帥

鄂督張香帥來電

江督劉峴帥來電

東撫袁慰帥來電

鄂督張香帥來電

又

福州善將軍來電

寄太原護撫李筱軒方伯

大沽李中堂來電

江督劉峴帥來電

東撫袁慰帥來電

又

寄江督劉峴帥鄂督張香帥東撫袁慰帥

寄保定榮中堂

寄西安陶子方督帥

寄江鄂東督撫帥

寄鄂督張香帥

濟南袁中丞來電

又

又

又

又

江督劉峴帥來電

又

又

各駐使電奏

張香帥另擬密電奏一件

寄天津李中堂

寄太原王中堂

寄江鄂東督撫帥

又

寄英京羅使俄京楊使東京李使

寄天津李中堂

又

寄李中堂江督東皖督撫帥閩善將軍

江督劉峴帥來電

鄂督張香帥來電

又

又

寄天津李中堂江鄂督帥東皖撫帥

寄劉峴帥

鄂督張香帥來電

天津李中堂來電

東撫袁中丞來電

寄天津李中堂

寄江鄂皖東浙閩各督撫帥閩將軍

天津新德使穆默來電

天津李中堂來電

倫敦羅星使來電

山東袁中丞擬電奏稿一件

寄各省督撫河漕提鎮藩臬運道

江督劉峴帥來電

鄂督張香帥來電

東撫袁慰帥來電

寄劉峴帥張香帥袁慰帥

寄閩許筠帥善將軍皖王灼帥

寄劉峴帥張香帥袁慰帥

寄濟南袁中丞

俄京楊星使電奏

愚齋存稿卷第四十二

電報十九

福州善將軍來電

光緒二十六年閏八月初一日

沁電謹佩篤論昨已電請香帥會商諸公奏懇榮
相赴行在病入膏肓不用猛劑必難挽救奈何
鄙人庸陋微淺徒抱慚憤

濟南袁慰帥來電

閏八月初一日兼致劉峴帥

德已知照各國查交禍首縱可不交必須懲辦斷
非美廷所能阻亦非他國所能勸端三十電有機
可乘惜無人接應善電甚壯未知有成否倘再遲

保定恐難保

寄天津李中堂

閏八月初一日

已將中堂奏請電致德皇必可做到告知穆使甚感又
告其俄提督已見一切候貴提督晤商請其電致見面
京津線德提允到津卽復中堂見時可再催復穆使初
三北上約初六七到能否候見俄法使到津否乞示

寄西安端午帥

閏八月初一日

密電已轉傅相房山北塘均失守德統帥明日到津添
來新兵兩萬各國陸軍均歸調度共約十萬人兵船運
艦約百餘隻均帶寒衣火爐預備過冬難保不相信傳

相三十電以後未知有何舉動看來開議尙早尊處如
得晉探仍求密示再退相於弟有知己之感諸帥有欲
單揭者已力阻未知能否急流勇退

寄福州許制台善將軍

閏八月初一日兼致江鄂督帥

奉聞豔電中國保守疆土誠只有牽制一法但目前總
以俄德爲榜樣如東三省不還日覲全閩何止一島峴
帥恐著跡管見以爲互保一島尙非全策

寄保定廷護院

閏八月初二日

三十電已轉傳相並告各領事自應聽候法使回信似
此辦法彼可無詞可和惜德帥德使已赴津不及面告

傳相屬搬移餉銀實爲要著

寄東京李星使

閏八月初二日

冬電分轉如禍首自懲亦可了事午橋電云督撫會効
聖意已動慰廷電云必須謀接應隊出使諸公措詞
尤易力量亦大請速密謀若前件一冷更難復燃公能
否密商諸公

東京李星使來電

閏八月初二日兼轉李中堂劉
峴帥張香帥袁慰帥

倫敦續電美廷駁斥德人之意以首禍人須請中
國自懲不宜令交出有妨中國體面探聞日廷復
文謂所言固是但恐耽擱開議遷延日久頗不利

於各國如不礙議期或可允辦云

寄保定榮中堂

閏八月初三日

奉三十電勦匪及迎護正定洋人情形已告各領事因
德使赴津已電傳相轉告頃聞俄德兵往攻蘆台佔唐
山煤礦俄欲佔鐵路直至榆關逕達牛莊德統帥到津
正欲用武適聞端邸入樞乃改宗旨伊聲言欲西追拏
禍首已預備過冬傳相云恐尙難開議達右翁在保否

大沽李中堂來電

閏八月初三日

德瓦提明日到津晤時先商一切穆使若初七到
或候晤美廷催開議慶邸亦催速行俟商瓦後再

定俄法使未來想在京候晤

寄俄京楊星使

閏八月初四日兼致李傅相

奉 行在初二日電 旨大清國大皇帝問大俄國大皇帝好此次中國變亂事起倉猝以致開罪鄰邦乃荷大皇帝顧念邦交允先撤兵爲各國倡感佩之忱曷有旣極用特派工部左侍郎楊儒呈遞國電先伸謝悃還祈大皇帝顧全大局轉商大德國大皇帝仍敦舊好務捐嫌隙以期和局早日定議則感荷高誼益無涯涘不勝盼切禱切之至太原發宣轉

寄俄京楊星使轉電德京呂星使

閏八月初四日兼致李傅相

奉 行在初二電 旨大清國大皇帝問大德國大皇帝好此次中國變起倉猝害及貴國使臣克林德朕馭下無方致傷睦誼一經追念軫惜益深本日已明降諭旨賜祭一壇著大學士崑岡前往奠醑並飭南北洋大臣於靈柩回國時妥爲照料抵貴國時再賜祭一壇派戶部右侍郎呂海寰前往奠醑用示朕惋惜不忘之意貴國與中國交誼素敦務望大皇帝以保全中外大局爲重盡捐嫌隙俾和局早日定議彼此永遠相安不勝盼切禱切之至太原發宣轉

東京李星使來電

閏八月初四日

江電卽商各使酌辦督撫劾電措詞輕重若何曾
指名否乞示

福州善將軍來電

閏八月初四日

樞廷無人舉措艱難公謂請榮相赴行在不知
甯鄂領銜會奏否乞速贊成

寄西安端中丞

閏八月初四日

三十電鈔送總領事來函甚感謝惟比國教士十五人
被戕旣稱恐是訛傳終非一定無害本總領事究難釋
然祈電請查明務得確耗等語乞再費神查示

寄北京慶親王天津李中堂保定榮中堂各省將軍督

撫帥

閏八月初五日

閏八月初二日內閣奉

上諭此次開衅變出非常推

其致禍之由實非

朝廷本意皆因諸王大臣等縱庇

拳匪啟衅友邦以致貽患

宗社

乘輿播遷朕固

不能不引咎自責而諸王大臣等無端肇禍亦亟應分

別重輕加以懲處莊親王載勛怡親王溥靜貝勒載濂

載瀅均著革去爵職端郡王載漪著從寬撤去一切差

使交宗人府嚴加議處并著停俸輔國公載瀾都察院

左都御史英年均著交該衙門嚴加議處協辦大學士

吏部尙書剛毅刑部尙書趙舒翹著交都察院交部議

處以示懲儆朕受 祖宗付託之重總期保全大局不能顧及其他諸王大臣等謀國不臧咎由自取當亦天下臣民所共諒也欽此 上諭大德國駐京使臣克林德前被兵戕害業經降 旨深爲惋惜因思該使臣駐華以來辦理一切交涉事宜和平妥協朕追念之餘倍加軫惜著賜祭一壇派大學士崑岡卽日前往奠醑靈柩回國時并著南北洋大臣妥爲照料抵本國時著再賜祭一壇派戶部右侍郎呂海寰前往奠醑用示朕篤念邦交惋惜不忘之至意欽此除電各駐使知會各國領事外宣轉

寄天津李中堂江鄂劉張兩帥

閏八月初五日

慰微電頃接晉探馬會奏件六人皆知某相二十八銷
假條陳 幸秦仍主戰議飭董添兵調鄧增同赴前敵
馬玉崑程文炳守潼關已飭多備車輛有初八 幸秦
說云宣轉

東撫袁慰帥來電

閏八月初五日兼致劉張兩帥

前聞京津陷時回民著峨冠爲俄兵內應以俄隊
多蒙古人甚相親密近日直境鹽山慶雲東境海
豐亦有回民被拳匪擾害因聚馬步多名攻殺拳
匪繼擾平民是拳與回亦難相處今將 幸秦調

鄧增馬安良詣行在西境空虛而長安素多回
民倘有拳匪煽動民回羣起相仇俄人乘之將進
退維谷似宜會奏飭下陝甘新疆各督撫嚴防拳
匪勾煽撫回令各相安以杜生患再刻下幸秦
與平時異設各國以車駕遠幸變計不退畿輔
則宗廟陵寢及八旗子弟安所依賴如
能就西多回民亦非樂土委婉諷動得阻幸秦
大局幸甚

江督劉峴帥來電

閏八月初五日兼致香帥慰帥

事至此何能再戰諸人殆自爲計耳此後事益棘

手全局危甚祈慰帥多發晉探杏翁飭太原電局
隨時探報一面將東兩微電速轉傳相

陝撫端午帥來電

閏八月初五日

前電 乘輿初八 幸陝之信頃據晉稟適聞何
副憲乃瑩彭御史述奏請 兩宮暫緩西幸王
大臣亦有疏諫初八啟蹕之說未知准否等語謹
聞

寄東京李星使

閏八月初五

李劉張袁會効端莊瀾剛趙英分別撤革懲辦初二
旨云云公與各使酌辦須趁交議時就各國意見直捷

電奏或分或合先發制人自可迎刃而解

寄俄京楊星使

閏八月初五日

李劉張袁會効端莊瀾剛趙英分別撤革候懲辦初二
旨云云各國恐尙不足意須趁交議時再有接應以
杜復燃慰廷電云出使諸公措詞尤易力量亦大木齋
允行似只須就各國意見直捷電奏或分或合均可代
遞請轉呂裕伍

寄福州善將軍

閏八月初五日

冬 旨大局之幸榮相必回 行在現商傅相擬請榮
入京與慶邸會商後再赴晉會奏仍不可少容商甯鄂

擬辦挽回全在樞譯得人如再所舉非賢何以救藥

寄東撫袁慰帥

閏八月初五日

毓佐臣實爲釀禍之首其在山東興會匪作惡根由乞速詳示

寄天津李中堂

閏八月初五日

冬電已轉梅提督廷護院並令黃道與地方官商辦慰電直境餘匪尙多必須派兵巡護求接篆後飭行今端王等均已撤革交議俄法使在京師宜速赴京與慶商接榮入都一晤便請其赴行在如各使不願認榮全權可與彼說明見面後卽將嚴辦禍首各節請榮回晉

面奏以期杜絕禍根

太原王中堂來電

閏八月初五日

勘電江到四銜箇電深契 聖衷已照行由尊處

轉 聖心洞澈利害當卽天心悔禍之機惟

慈意決計西行求止不能求緩不得已定初八

啟變能不致因此決裂否殆亦有定數存焉

寄東京李星使

閏八月初六日兼致李傅相劉峴帥張香帥

行在初三電 旨大清國大皇帝問大日本國大皇

帝好前因貴國書記生杉山彬在永定門外以口舌細

故被戕深恐有乖鄰誼當卽降 旨緝匪懲辦追念該

書記生被戕情事彌深惋惜本日已明降諭旨派禮部右侍郎那桐前往致祭並賞葬祭銀五千兩靈柩回貴國時令內閣侍讀學士李盛鐸派參贊官一員再行奠醑用示朕惋惜不忘之意貴國與中國同文同洲素敦和誼此次中國開罪友邦蒙大皇帝極力維持感激之忱曷有既極還望諄勸各國早定和議則保全東方大局裨益實多朕不勝禱切盼切之至太原發宣轉

東撫袁慰帥來電

閏八月初六日

兩微電已電商榮但不必候復請先商辦想必樂從毓在東倡爲義民說諸匪仇教曲意庇縱凡牧

令指爲匪者必喝斥緝辦者必撤參去冬在京結
徐崇剛等多方蠱惑自稱爲拳首義團之興實毓
肇之在晉誘洋教士五十餘人至省駢誅之手刃
洋婦孺各一人奏報晉境洋人一律肅清並刊告
白譽獎拳匪所部佐軍皆匪裝似此足供新聞

又

閏八月初六日兼致傅相峴帥香帥

某老倡言招撫引匪入京中外切齒現仍條陳主
戰不先去之終恐掣肘務請速電傅相趁其候議
不能入直再專言之必可罷斥且此人過於輕辦
各國亦不甘心可否請復

江督劉峴帥來電

開八月初六日兼致香帥慰帥

東歌電悉具見苦心補救佩甚處分王大臣已見
明諭尤冀暫不 幸陝已電詢午橋如確已定
期當請傳相體察情形酌量會奏諫阻至直東兩
省勦拳撫回則傳相慰帥優爲之也

鄂督張香帥來電

閏八月初六日兼致峴帥慰帥

濟歌電悉以回患阻 幸秦實防千里草耳盡謀
極佩惟鄙意宜極言殘兵無械萬不能戰有險無
械亦不能守再力言董徒大言跋扈曷嘗一戰加
以陝多回近俄董部多回馬安良軍皆回拳回又

相仇 乘興肘腋萬分可慮大意只是不可再戰
不可近回兩義耳各國要挾及京城勿棄各節皆
不必說但扼定 諭旨一誤再誤悔之無及兩語
言此時再戰則誤後加誤深入回中則悔外有悔
實不忍處 兩宮於至危之地等語以此立言
願聯銜者必多似須候傅相京津續電並探各國
見冬電 旨後語氣酌量措詞較爲緊切頃陝歌
電想已見此奏應遲應速統請裁酌示復

寄天津李中堂江督劉峴帥鄂督張香帥皖撫王灼帥
東撫袁慰帥成都綽將軍奎樂帥

閏八月初六日

奉魯歌鄂語電諫阻 幸陝一節午帥電王大臣及何
乃瑩彭述已奏暫緩頃德總領事面稱 兩宮回京
和局易定答以洋兵不退臣下決不敢請彼又稱赴陝
確否答以我前告貴國欽差如攻保定 幸陝必速聞
各國均願 駕回以此可挾制停兵目前局勢似以暫
駐太原爲穩慎如欲經營陪都亦宜俟諸異日倘蒙塵
不返中外人心不安恐迫成分裂偏安之局慰帥偕回
部立言香帥主不可近回不可再戰應請峴帥香帥主
稿領銜會奏傅相在津似立言應稍殊擬請傅相單銜
電奏以免延誤

鄂督張香帥來電

閏八月初六日

聞慶邸入京從人所帶刀械盡爲洋兵搜去到京後洋兵守護其府如確殊於局面有礙傳相到京想各國相待不至如此何日到京祈探詢日期情形示復惜不能在京議耳

江督劉峴帥來電

閏八月初七日兼致香帥慰帥

鄂語電悉諫阻幸秦必由傳相酌量措詞方緊切動聽兩宮方能放心濟鄂兩電皆慘淡經

營祈杏翁轉傳相察酌辦理坤當列銜

東撫袁慰帥來電

閏八月初七日兼致峴帥香帥

鄂語滬魚均悉欽佩惟殘兵無械不能再戰一節
我輩皆疆帥甯鄂製造有年齊兼統軍且迭促開
議雖無再戰明文措詞似須審慎防人摘詰聞董
騷擾亦爲上所憎似宜側重縱兵搶掠公家未
得其力紳民先受其害徒足肇亂實多可慮一層
乞採擇

鄂督張香帥來電

閏八月初七日兼致峴帥慰帥

頃峴帥陽電欲將敝處語電請杏翁電傳相酌辦
云云查昨語電所言草率挂漏本意全未說明措
詞亦甚不妥且鄙意亦不堅阻幸陝恐傳相略

採數句參以眾人議論必失其真萬萬不宜務請
杏翁勿電傳相如已轉電務請再速發一電將前
語電塗銷叩禱現擬有一電奏全文錄請峴帥慰
帥杏翁詳核酌示再定盼杏翁示復

又

閏八月初七日兼致峴帥慰帥

謹擬密電奏一件劉張奎綽許善德丁王袁會銜
其文曰臣某某等跪奏爲開議可望戰議不宜再
誤衛軍宜加慎選以安 兩宮而定危局恭摺

密陳仰祈 聖鑒事竊臣等伏讀七月二十六日

上諭有云庶幾不遠而復天心之悔禍可期仰

見 聖明虛懷克己上念 宗社下卹生靈鑒

於前事之失力圖挽救之方謹按周易曰不遠之
復無祇悔元吉又曰迷復凶蓋凡事措置失宜致
生災患早思變計則吉終於不改則凶此久已在

聖諭鑒照之中者也計大學士李鴻章到津已
久當已入京與慶親王榮祿接晤與各國籌商開
議大局似有轉機乃近日傳聞隨扈諸臣仍有力
持主戰之議者臣等不勝焦慮當京津未失之前
猶謂有兵有團尙可一戰今拳匪已技破竄散矣
素練敢戰之兵如羅軍宋軍馬軍驍軍呂本元之

練軍已於大沽天津北倉等處苦戰傷亡殆盡矣
略有虛名尙望能戰之兵如張春發萬本華夏辛
酉諸軍已於河西務見敵而潰矣其大言欺罔首
禍殃民之董軍殘毒京城從未與洋兵一戰寇逼
時出城卽大掠而西矣其餘各營更不足數現在
隨扈諸營或敗殘士卒或新募烏合或跋扈叵測
之悍將耳且津局之械京營之械援軍之械盡以
資敵此時購無從購造不及造滬鄂兩局所出有
限斷不能遍供諸軍現在隨扈及新調之軍約計
每槍一枝斷無彈子五百顆只開一兩仗立卽束

手旣無軍火將何以戰各省軍民雖有忠義無槍
豈能攻擊晉陝雖有險隘無礮豈能拒守若欲再
挑強敵此萬萬無可徵幸者也又聞車駕因欲
幸陝特調馬安良一軍似議戰諸臣殆將以遠
避爲可戰以回軍爲能戰耳不知我能往寇亦能
往不畏三萬里之海豈畏二千里之陸敵人愈深
占地愈廣況董福祥所部半係回兵馬安良所部
盡係回兵西安回民素多甘省向係回藪猶憶五
月三十日諭旨有禍起肘腋朝廷苦衷等諭
臣等至今思之猶爲痛心今若乘輿幸陝而又

多調回軍養虎自衛誠恐肘腋之間無非回人是在京爲拳匪所挾制出京又入回軍之掌握誠如諭旨所云一誤而再誤矣此時若再開戰俄變前議則據遼東 陵寢阻隔矣德變前議則攻保定畿輔淪胥矣外而沿江沿海處處佔奪內而各省會匪紛紛擾亂加以陝晉豫歲荒糧貴賦稅無多必資外省接濟若曠日持久各省皆戰爭紛擾之餘 行在六軍之糧餉設有不備臣子之心何以自安此時和議早成京城必復天津可還東三省可退雖或分據形勢不能全數侵吞即使要

約多端 國體猶存尙可休養支拄尙再挑強敵
逼成瓜分養虎自衛後患難測此輩怙非大言之
人絕不爲 大清二百數十年之 宗社計不
爲二十二省數萬里之疆土計不爲 兩宮之
安危計此臣等所以焦灼急迫不敢不痛哭流涕
瀝陳於 皇太后 皇上之前者也竊謂洋兵
未盡撤退 回鑾固爲險著若回軍滿布左右則
幸陝尤屬危機總之無論在晉在陝扈衛諸軍
宜專選忠純馴良之將 聖躬旣安則天下臣民
之心皆安然後 廟謨默運可以熟計通籌臣等

合詞迫切密陳謹電由護陝西撫臣端方繕摺馳遞伏祈 皇太后 皇上聖鑒謹奏等語請三公詳審妥酌從實刪改可用則用不可用則止能電寄津請傅相酌定領銜最善候示復

福州善將軍來電

閏八月初七日

冬 旨謹悉誠如公言及今挽救已非易易勛望如傅相香帥當世有幾奈何樞譯尙輕外人能無聞言否

寄太原護撫李筱軒方伯

閏八月初七日

初三 上諭初七到滬恐遲誤要事請暫設馬撥至俟

馬俟電線接通即可裁撤

大沽李中堂來電

閏八月初七日

支豪微電悉明發 旨二道希速電並電各駐使
端等撤革交議當漸有轉機國電已分致德瓦帥
穆使俄提督等瓦穆均到尙未晤俄使奉國命來
津約初九到滎相日本使允保護照料已派員接
來津或一同入都京津線各國已允璞爾生另辦
尊處應先接德線剛趙果撤樞輔非滎回不可會
奏已發否希轉峴帥諸帥並示方述兒

江督劉峴帥來電

閏八月初八日兼致香帥慰帥

鄂虞電悉初二 諭旨懲處王大臣並致俄德日
國電似不致再主戰議香帥之意殆慮馬安良回
軍奉調與重軍合恐有刼制蹈拳匪覆轍耳疏稿
纏綿悱惻大臣謀國固應如此然與目前局勢究
有不同若諫阻 幸陝止調回軍則宜另行措詞
亦總以傅相酌奏兼敘北事方能切實祈酌
東撫袁慰帥來電

閏八月初八日兼致峴帥香帥

鄂虞電悉密奏拜讀剴切痛快欽佩莫名擬僭加
數處乞裁酌仍有力持主戰之議者下加夫以一
國殘敗之卒當各國聯合之師強弱勝負較然易

明其猶力持戰議者殆不過內怙前非外託讜論
爲旦夕自保之計非真能熟權利害憂國如家者
也臣等遠道聞之不勝焦慮臣子之心何以自安
下加江海各省之要隘萬有一失疆臣効死又何
補大局云馴良之將下擬指名加如提督朱慶等
量予事權責成約束熟計通籌下加臣等仰承高
厚固不敢稍涉畏葸辜恩溺職尤不敢徒託大言
欺君誤國謹合詞迫切密陳云云其餘各營更不
足數八字似涉榮軍請刪去入回軍之掌握一語
或改在外又將爲回軍所把持誠如 諭旨所云

句擬改爲誠如八月十五日諭旨所云傳相注意回鑾此奏有回鑾固爲險著及無論在晉在陝等語恐未必盡合其意三公酌定即可約各省電端繕遞致延時日是否請詳核

又聞八月初八日兼致峴帥香帥

滬庚電悉各國請回鑾乃愈去愈遠是拂其意也方望開議恐因此又生枝節香帥擬奏件宜速約發仁和此電似亦望外援

寄江督劉峴帥鄂督張香帥東撫袁慰帥

閏八月初八日

甯庚濟齊電悉頃晤德俄領事均稱旣辦禍首即可

回鑾了事較易若仍違行恐尙非真心議款必啟各國
猜疑仁和所慮頗確刻接陝藩庚電幸陝尙無的期
先有初八啟鑾信又聞暫緩趁此活動會摺卽請速
發香帥因聞有人主戰故如此說實則聖慮洋兵西
犯耳非主戰也或請香帥酌刪卽發切勿因此擱起傳
相赴京長電難達星源來電請列其名

寄保定榮中堂

閏八月初八日

魚電謹悉聖心已洞澈利害當卽天心悔禍之機惟
聞慈意決計幸陝恐各國又啟猜疑如初八未
行各帥將勸阻芝帥雖入贊公到京後似宜早赴行

在此意已商傅相頗謂然並屬慰詳函陳

寄西安陶子方督帥

閏八月初八日

調粵幸愜鄙望粵盜復熾公速赴任尙不致難收拾

聖駕如緩幸陝何日赴行在兩宮聖明全在

匡弼得人轉移危局公宜直陳讜論際此艱難進言較
易聽耳

寄江鄂東督撫帥

閏八月初八日

奉甯陽濟虞電疏稿痛快淋漓不參董而自警忱不阻

幸陝而自可緩朝廷雖無再戰之意而不妨痛論

以堅聖意鄙見不必傅相領銜徒多耽擱卽請劉張

兩帥領銜速電午帥繕奏免再延誤語電本未電津

寄鄂督張香帥

閏八月初八日

傅相到京彼族相待未必優於慶邸如 駕幸陝恐阻
開議試想鐵路不通各使肯往駐陝耶宣與公皆主備
陪京但此次不可遷遷則成偏安之局慰帥前探某相
主戰似不確乞酌刪速發關係至鉅

濟南袁中丞來電

閏八月初九日兼致峴帥香帥

鄂庚酉電悉董與宋魏均有隙似宜託防俄回爲
名令酌帶親兵赴任另募新軍而密飭魏中道圖
之所部各營先令分枝分紮交宋節制依次遣散

輩去而兵分自無能爲仁和善遣兵如令會宋辦
尤妥管見若是祈採酌

又

閏八月初九日兼致峴帥香帥

滬霽電悉如眞 幸陝京津恐難完璧東三省更
不待言關係甚重卽請杏公速電傅相會同慶邸
電阻我輩仍另會奏加功

又

閏八月初九日兼致各省將軍督撫

頃接陳京堂夔龍上月二十八日專書稱刻由慶
邸聯在京各官銜名合詞恭請 回鑾不知 聖
意如何倘外省疆臣合詞電請早日 駕旋尤爲

大局之幸屬轉達云尊意如願會奏請逕電峴帥
主稿領銜會奏盼復

又閏八月初九日兼致峴帥香帥

杏公佳電悉傳相單奏借各國立言爲切實動聽
諸公可另約會奏爲接應如借諸公立言似不便
再上愚見斷不可

又閏八月初九日兼致峴帥香帥

鄂青電奏稿拜悉詞嚴義正足破奸膽惟凱並統
武衛右軍六七月閒頗有謂不敢與洋兵一戰者
稿內有並未與洋兵一戰七字請酌改爲未列隊

迎戰六字凱便可附名現謀阻 幸陝似無論在
晉在陝一語擬請酌改統祈裁奪

江督劉峴帥來電

閏八月初九日兼致香帥慰帥

鄂齊戍電悉疏稿甚佩擬請將實以董福祥爲禍
首八字改爲董福祥不能辭咎七字自謂能與洋
戰六字改爲自謂足以敵洋六字疏內未阻 幸
陝今日杏翁電俄德領之言若西行必礙開議萬
一各國變其宗旨以自棄京城爲詞佔據京津及
東三省仍偪成瓜分局面偏安豈是長策似諫阻
幸陝必不可少祈香帥酌添速發不必再商

又閏八月初九日兼致香帥慰帥

滬霽東兩青電悉會奏件請香帥速改電發並請
杏翁電傳相奏阻幸陝俄德領事語必宜敘入
庶可動聽至董解兵柄酌歸宋馬接統從容裁撤
自是正辦中道圖之似難措詞

又閏八月初九日兼致香帥慰帥

鄂庚酉滬庚濟庚齊各電均悉既定初八啟鑾
此奏已後時然不可不發以冀還幸太原初擬
由傅相酌奏語較切實今不及候矣惟阻戰一節
斷斷不可香帥庚酉電擬刪去是極請速就原稿

酌改速發鄙意論回軍之弊較幸陝尤甚宜加重語卽不能阻西行尙可免將來刳制之變奏內似宜陳明止論回部至董軍罪狀罄竹難書此時宜從寬解兵柄開底缺不可令回任致滋意外統祈酌裁慰帥庚電愈去愈遠是拂其請等語甚扼要務望入奏何日發並示

各駐使電奏

聞八月初九日由滬轉陝護撫端午帥代奏

請代奏密呈御覽時事急迫亟宜速籌和議以挽危局而杜後患現各國推原禍始咸謂偏信拳匪輕絕舊好欺奏肇亂誤國殃民不得不痛恨歸

咎於李秉衡毓賢徐桐剛毅趙舒翹端郡王莊親
王瀾公董福祥等諸臣或釀禍於事前或袒匪於
事後除已死者免究外若不嚴辦未便休兵等語
德國挾殺使之嫌通告各國須索交罪首方肯開
議惟美國復稱應由中國自行懲處餘國均允照
辦蓋將併力要素期於必行竊以德統帥現已到
華各國之軍統歸節制意在非開議不停兵非懲
惡不開議曠日持久不特佔據都城且將肆擾北
省牽動東南甚或大舉西向外侮不休內亂可慮
大局益難支持爲今之計惟有請
皇太后

皇上上念 祖宗締造之艱下孚中外臣民之
望搜索罪首立予嚴懲與其脅制於人授彼駢誅
之柄何如黜陟自上存我自主之權否則無以明
中朝悔禍之心無以謝數萬生靈之命且無以杜
諸強有挾之求安危存亡在此一舉禍魁既罪和
議可成 宗社幸甚天下幸甚謹冒死瀝陳楊
儒呂海寰裕庚李盛鐸羅豐祿伍廷芳謹奏

張香帥另擬密電奏一件

閏八月初九日由滬轉
陝護撫端午帥代奏

其文曰臣某某等跪奏爲任將不宜再誤衛軍宜
加慎選以安 兩宮而定危局恭摺密陳仰祈

聖鑒事竊臣等伏讀七月二十六日 上諭有云庶幾不遠而復天心之悔禍可期仰見 聖明虛懷克己鑒於前事之失力圖挽救之方曷勝欽悚謹按周易曰不遠復無祇悔元吉又曰迷復凶蓋凡事措置失宜致生災患早思變計則吉終於不悟則凶此事已在 聖諭鑒照之中者也竊維此次肇衅誤國之由實以董福祥爲禍首平日大言欺人自謂能與洋戰五月半閒首戕洋官六月以後專攻使館其軍半與拳匪勾通拳匪焚殺董軍劫掠狼狽相倚殘毒京城既不聽大學士榮祿

節制並不遵 諭旨調遣及外患日急大沽天津
北倉諸軍苦戰數旬傷亡殆盡河西務諸軍雖然
潰敗究屬見敵惟此欺罔跋扈之董軍並未與洋
兵一戰出城後卽大掠滿載驅之而西京畿人民
言之切齒聞該軍隨扈太原尙有二十餘營又聞
車駕因欲 幸陝特調馬安良一軍此必董福
祥乘 國家危急之時妄言回軍能戰冀以廣樹
黨羽挾制 朝廷查回性很鷙向不馴良董福祥
所部半係回兵馬安良所部盡係回兵西安回民
素多甘省向係回藪猶憶五月三十日 諭旨有

禍起肘腋 朝廷苦衷等諭臣等至今思之猶爲
痛心今若 乘輿幸陝而又多調回軍養虎自衛
誠恐肘腋之間無非回人將來 朝廷一切措置
皆不能徑行其意是在京爲拳匪所挾制出京又
爲回軍所把持誠如八月十五日 諭旨所云一
誤而再誤矣蓋董福祥自知罪惡多端不僅爲各
國所深仇實爲天下臣民所共憤以故增兵自衛
便其私圖似此欺罔肇禍始終怙非絕不爲 大
清之 宗社計不爲 兩宮之安危計若不
及早慎防誠恐後患難測此臣等所以焦灼急迫

不敢不披瀝直陳於 皇太后 皇上之前者也竊謂洋兵未能盡撤則 回鑾實爲險著若回軍布滿左右則 幸陝尤屬危機總之無論在晉在陝扈衛諸軍宜專選忠純篤實之將可否請旨將董福祥交部嚴加議處罷其兵柄所部各營令宋慶馬玉崑岑春煊錫良四人分統之分爲四軍其勢自戢部署略定以後分別撤留能守軍律者留之桀驁擾民者裁之其馬安良一軍尤懇不再徵調 兩宮旣安則天下臣民之心皆安然後 廟謨默運可以熟計通籌臣等合詞迫切密

陳謹電由護陝西撫臣端方繕摺馳遞伏祈

皇太后 皇上聖鑒謹奏

寄天津李中堂

閏八月初九日

陽電已分轉請榮相回晉因慰廷欲推中堂與慶邸專
奏故會奏未發如因同奉全權不便言仍當請峴帥領
銜速辦德津線詢梅提督黃道迄無復卽到津亦不能
達京若京津線爲璞爾生辦利權盡爲彼佔如未定擬
令大北代辦照水線例電費仍歸我收約定仍歸我管
晤德俄乞代商

寄太原王中堂

閏八月初九日

歌電已轉杭宅俄德急請 回鑾傅相答以洋兵未退
礙難迎請昨聞 幸陝恐啟猜疑聞各帥有電奏乞主
持緩進以維危局

寄江鄂東督撫帥

閏八月初九日

濟兩青電悉香帥既專主防回効董二事只可請傅相
單奏借諸公立言以見詢謀僉同若真 幸陝聯軍決
不肯退

又

閏八月初九日

鄂齊電僅言防回効董此奏不必商傅相徑請繕發如
照宣擬佳電由傳相另奏兩事仍可相合

寄英京羅使俄京楊使東京李使

閏八月初九日

頃謀奏阻

幸陝盍各就情勢分奏乞轉諸公

寄天津李中堂

閏八月初九日

仁和歌電

慈聖決計西行陝藩庚電初八欲行暫

緩俄德均請

回鑾若復幸陝難免猜疑且恐偏成

偏安之局已請劉張各帥會奏但張主西遷恐游移延

誤乞中堂速電奏止緩

又閏八月初九日

初六旨初八

幸長安慰電慶邸率京官請迎鑾斷

不允昨請師奏暫駐晉惜已遲榮相赴行在請刪主

持兩字並刪慰名

寄李中堂江督東皖督撫帥閩善將軍

閏八月初九日

聞各國使臣以此次拳匪攻圍使館實有榮中堂所統武衛軍在內其所獲旗幟號衣洋槍皆有某軍字樣執爲確據故此次派爲全權大臣除日本外各國均有不願與榮會議之說如此情確鑿與其候各使阻我全權入議莫如自行調回以尊國體況樞垣主持參贊尤屬需人似應由中堂約榮到津或同赴京與慶邸會商大概卽請榮中堂先赴行在以紓兩宮宵旰憂勞應請中堂速奏請旨如諸帥謂然請速電傳相馳

奏遲則赴京後長電難寄

江督劉峴帥來電

閏八月初十日兼致香帥慰帥

東佳青滬佳電均悉

聖駕已行未必遽肯回晉

然關係太重不可不奏若請回京尙非其時昨會

奏防回劾董稿內有

回鑾爲險著語尤形矛盾

陳京兆所請礙難照辦否公稿甚佩第武衛軍攻

使館各語似與榮相有礙其全權旋請旋撤亦礙

體制不若由傅相據外人言入奏回晉可辦議

幸陝則中變較爲切實動聽榮相則以要件須面

奏赴

行在最要剛趙旣去不致再有梗阻又

聖意必欲幸陝高深難測鄙見總須將外人尊

崇兩宮之意陳明此節即可由榮相面達祈

杏翁速轉電傳相似不必屢以外吏言轉陳

鄂督張香帥來電

閏八月初十日兼致劉峴帥

擬會峴帥銜致各駐使一電其文曰東京李欽差

彼得羅堡楊欽差巴黎裕欽差倫敦羅欽差華盛

頓伍欽差聖駕幸陝爲太原甚苦晉省旱荒糧

缺又經毓撫引來拳匪擾亂數月商民逃避省城

一空故不得不幸陝暫駐決非遷都且陝省電

與滬通奏報請旨甚速議款較晉爲便此皆實

在爲難情形況盧漢鐵路必須修成枝路接修至
陝盛京卿久已定議豈陝省各國不能到也暫未
回鑾者因洋兵未撤不免憂慮此是人之常情
當蒙各國體諒其實在陝與晉同並非以遷避拒
和議務望轉達外部免致猜疑變計至禱並轉呂
星使劉坤一張之洞同電等語公如謂然請酌核
改定速電滬發如尊見不同亦請速發洞當單銜
發請杏翁候峴帥電到再發

又慰帥王灼帥

閏八月初十日兼致李中堂劉峴帥善將軍袁

慰帥青戍電杏翁佳戍電諭榮事均悉若欲榮相

回行在必須榮與慶李晤商後此時自必有種種爲難必須面奏事件三全權會奏請回因合規矩亦是開議實情慰帥所籌精密自然是極是極應請杏翁將慰帥電意速電傅相此外再無辦法斷無各疆臣會請之理若疑及求援更多妨礙且當日據日本指名請派今無實據而云各國不願尤屬不可將來再有據各使來電入奏之事朝廷尙肯聽耶此事萬分不安洞斷不敢列銜並望傅相及諸帥杏翁詳酌勿發切禱

又

閏八月初十日兼致劉峴帥袁慰帥

回鑾萬不可行 幸陝萬不能阻其實決裂與否全不在此能將各國屢次明言力索之事順辦則 幸陝彼亦不管若不肯辦則允 回鑾亦無益此時已 啟鑾既不便回太原中途所蒞皆是窮苦空城不到陝將駐何處況陝電靈通於開議亦實有便處慶邸到京搜盡刀械洋兵守護傳相到津洋人看守屬員不准衣冠假如 兩宮回京試思當是如何景象我等豈忍出此傳相陽電某某撤樞輔恐無其事嚴加二字尙無何論其他慶邸傳相專請 回鑾阻 幸陝似不可解總之

若專阻 幸陝洞斷不敢列銜望深思俯鑒

寄天津李中堂江鄂督帥東皖撫帥

閏八月初十日

慰帥電接榮相庚電云會商後卽奏明請仍回行在

面奏一節應俟祿進京與慶邸李相會商後斟酌祈轉
達杏蓀等語甯鄂稱東電極是自應到京斟酌西幸長
安已 啟鑾矣佳電擬請兩端乞註銷

寄劉峴帥

閏八月初十日

奉卦電諫西幸又落後著聞鄂主遷意不同 旨稱長
安將久居恐各國變計吉林失榆關失瀋垂危

鄂督張香帥來電

閏八月初十日

今晨業已電想已達覽務請將決非遷都四字及
況廬漢鐵路至不能到乎三十二字均刪去以省
枝節究竟峴帥尊意如何祈速示

天津李中堂來電

閏八月初十日

西行必無回期殊失中外望回董似不至爲亂各
便不願榮與議昨電請 召赴行在或蒙准鴻定

十一進京以後文電由赫德轉交希轉各帥

東撫袁中丞來電

閏八月十一日兼致峴帥香帥

頃接太原初四探報端出兩樞尙未撤差仍入直

原定初八

啟鑾慶邸聯留京諸大臣奏請 回

鑾並呈各國信德法不與大約少緩西巡云仁和
江函有仍暫候傅相進京後消息說是皆在初六
前

寄天津李中堂

閏八月十一日

慰電頃接黃花農自德來電接津探初六有德俄等兵
萬餘過良王莊分路一由青縣攻保一由運河至四女
寺勦匪且恐到德駐紮初八已至唐官屯等語請杏翁
轉電傅相倘其果來何以應之迅速示復云

寄江鄂皖東浙閩各督撫帥閩將軍

閏八月十一日

傅相蒸電西行無同期云云聞傅相報啟程電奏內云

再各使以圍館有甘軍武衛中軍係榮祿所部不肯接待保護恐有險可否特 召回行在當差只此數語單銜不涉各帥銜名

天津新德使穆默來電

閏八月十一日

盛大臣鑒初五日尊電及鈔附光緒皇上致德國皇帝之慰電均已收到感甚

天津李中堂來電

閏八月十一日

各使電極剴切佳電除代遞外已出奏否俄德使噴有煩言謂此大罪仍交議顯欲寬縱何若徐許無罪被戮之爽快必將并力要素甘受挾制詢諸

帥能設法否德兵出擾靜海以上文報已阻德線
暫緩璞承辦京津線卽成如令大北代辦只添一
條作爲商線歸我收管亦佳不必商各使

倫敦羅星使來電

開八月十一日

祈轉慰帥代奏初二初三等 諭旨英倫傳播咸

仰 聖明惟彼族終以首惡諸人尙未重懲爲憤

此次禍變西人指爲十九周所未有始於毓賢成

於剛毅趙舒翹而戡漪實主之且毓賢於 行在

輦轂之下誘殺無辜英主聞而心傷外部特送說

帖痛陳此事伏乞

皇太后

皇上大振天威

立予嚴辦並請 旨飭下將山西省內未死之洋人優加保護庶內快天下人心外服彼族羣喙國本不搖邦交可復 宗社幸甚中國幸甚豐祿

叩

山東袁中丞擬電奏稿一件

閏八月十一日

奏爲偏安必不可成京師必不可棄籲懇降旨明示轉圜以定人心而安大局恭摺瀝陳仰祈

聖鑒事竊自拳匪肇亂構衅列邦津京相繼失陷遼東因亦不守以致 宗社震動 乘輿播遷

薄海臣民皇皇失措莫不謂拳黨覺禍貽誤國家

疾首痛心同切憂憤迨疊奉 明詔 車駕暫幸

太原勦治匪徒議及親貴天下士庶又莫不感激

悅服鼓舞歡呼是我 皇太后 皇上前者之

苦衷今者之英斷仁至義盡早爲中外所同欽方

冀畿輔廓清指日 回轡上慰 九廟在天之

靈下遂億兆蒼生之望日昨恭讀電傳本月初六

日 諭旨現定閏八月初八日 啟鑾西幸長安

等因欽此臣等至愚鯁鯁過慮有不得不直陳於

我 皇太后 皇上前者伏查自昔遷都出於

全盛之時則易而安迫於多事之秋則難而危宋

臣蘇軾論之詳矣蓋臨幸雖在一時而基業實繫萬世苟徇偏安之說權宜遷徙未有不積弱不振者也況陝西地方荒瘡貧苦古稱天府今非雄都又與新疆甘肅爲鄰新疆近逼強俄甘肅尤爲回藩內訌外患在在可虞較之京師雖云完善卽就目前言之各國方以新勝之師聯合圖進我能往寇亦能往不畏數萬里之海豈畏二千里之陸恐山川之險未可憑恃卽偏安之局不可幸成也且京師根本重地四方所拱極而朝宗者也宗廟宮闕列祖列宗之神靈所式憑者也二百餘年

來邦基固矣一旦棄之不特失臣民之望度亦非
聖心所安前聞各國曾請退兵迎鑾不佔土地
無論所請果否出於至誠正可藉回鑾之說以
速其撤兵之議倘西幸愈遠是拂各國之請而阻
就款之忱萬一激變宗旨洋兵不撤京師從此淪
胥矣遼東不復陵寢從此阻隔矣一國變計
各國爭先外而沿江沿海處處侵佔內而奸宄生
心紛紛擾亂瓜分之勢成糜爛之禍亟人心愈搖
餉源益竭而朝廷徒局促偏安爲閉關自守之
計夫以秦隴之瘠苦供應扈從之萬眾久將不給

以一隅之兵力抗禦諸國之精銳勢必難支存亡
關鍵實在於此臣等萬死奚足補救伏乞 皇

太后 皇上追念 列祖列宗創基之艱難俯

恤滿洲八旗生齒之蕃衍外順各國迎駕之請內
慰臣庶懸闕之心擬請 聖裁收回幸陝成命若

乘輿已發距陝伊邇勢難折回亦乞明降 諭

旨布告天下具言此次幸陝亦係暫計俟畿輔稍
定卽行 回鑾並由京 簡派王大臣致祭

宗廟恭謁 諸陵示天下以 朝廷不忘

宗廟 陵寢之重斷無終不 回鑾之理一面

飭令全權大臣等婉告各國使臣果其退兵示以必返庶足以定人心而安大局臣等愚慮所及不敢不昧死瀝陳謹合詞電由護陝撫臣端方繕摺

具奏伏乞

皇太后

皇上聖鑒訓示謹奏

寄各省督撫河漕提鎮藩臬運道

閏八月十二日

現尙在京之各省官紳商民百物蕩然一籌莫展苟延旦夕急切望援宣懷因與肇熙錫汾官應信厚元濟樹藩廷臬則敬裕福等在上海中國通商銀行內議設救急之法懇由李傅相照會駐京各使在京設局由各省同鄉結理現先籌款隨後設法運糧均請傅相轉交如

藉眾擎得以推廣自官紳以迄商民自京城以迄畿輔
務期盡力救濟乞卽設法勸助各省同志有專款寄其
親友者亦可代寄除將辦法章程函達外特先電懇酌
助感禱

江督劉峴帥來電

閏八月十二日兼致香帥慰帥

疏稿詞意肫摯極佩洋兵未退旣不敢遽請回
鑾西幸長安又慮各國梗議乘輿已發詎能折
回欲圖補救惟有先請諭旨事定回京庶可杜
外人之口此奏甚有關繫卽祈慰帥商各省聯銜
電陝入奏坤當列銜初七又有啟鑾通諭擬附

一片文曰再臣等正會商電奏開續奉本月初七日諭旨太原荒歉供億維艱且電報不通輾轉延誤不得已西幸長安等因欽此仰見天心仁愛體恤民生並以時局急迫深慮要件或有遲誤故爲此不得已之舉是駐蹕長安可暫不可久已在聖明洞鑒之中顧臣等鯁鯁過慮者則以

宗社爲重深恐各國以自棄京城爲言變其宗旨分佔要地開議無期大局不可收拾仍懇俯如臣等所請明降諭旨以慰臣庶之心以遂各國之望謹附片具陳伏乞聖鑒謹奏云祈一并裁酌

電商附發爲荷

鄂督張香帥來電

閏八月十二日兼致李中堂劉

視帥袁慰帥

茲擬會峴帥銜電致上海各國總領事託其轉致北京各公使及聯軍各統領并由各總領事一面電達外部其文曰探聞德俄印度兵已過天津南下沿運河勦匪現已到天津南一百數十里將近滄州並有赴德州之說查自拳匪作亂以來山東袁中丞保護租界及教士教民最爲出力旣勦東境拳匪又派兵越境勦直境拳匪共誅戮數千人拳匪終不能過德州一步袁中丞前已屢次奏勦

匪近日又兩次聯名請懲首禍此皆山東顧全大局力阻戰事之明證 朝廷今已極意願和雖開議漸有轉機而德州屬在山東境內各國出兵以勦匪救使爲名素不仇視山東似無侵入德州之理如德兵果有此意必係憤氣未平請各總領事速發電轉懇各欽使及聯軍各統領或一面電達外部顧念山東無辜生靈不應爲直隸拳匪所累致受兵火之禍共持公義出爲勸阻使德俄兵勿至德州則非獨山東數百萬良民心感各大國之義卽南方各省聞之亦曉然共知各國毫無遷怒

無辜之舉和局一定嫌怨盡捐豈非盛美坤一之
洞因山東保護商教與長江各省事同一律故不
能坐視不言務望迅速轉電仍希電復等語請峴
帥酌定後迅卽電上海各總領事並請杏翁先將
此意探商各總領能代爲轉達迅賜示復至慰帥
處可否亦將此意詢商烟台各總領事及膠州德
官并請慰帥斟酌

東撫袁慰帥來電

閏八月十二日兼致劉峴帥張香帥

香帥真亥電悉苦心孤詣顧全大局東省官民感
銘刻骨惟迭得續探聯軍大隊由靜海渡河而西

傳說將赴保定分兵千餘至唐官屯搜查拳匪卽折回云似爲旁護隊防匪斷後非有意南向且聞各國均有兵同行惟德兵較多致各總領電似宜稍緩俟探確果南圖再發乞酌

寄劉峴帥張香帥袁慰帥

閏八月十二日

鄂擬電滬領事文頃面商熟悉總領事據云只可代達外部公使論分際不能逕達統領擬改轉懇外部及各領使又德俄印度兵擬改探聞聯軍已過天津餘甚妥等語卽請峴帥徑電或由倣處鈔電函致均可

寄閩許筠帥善將軍皖王灼帥

閏八月十二日

初八 幸陝大拂各國意將攻保定慰帥擬會奏請明
降 諭旨事定回京以安中外人心諒蒙 俞允峴帥
領銜川粵東浙均列銜台端是否列銜乞示另寄奏稿
寄劉峴帥張香帥袁慰帥

閏八月十二日

東擬會奏切實沉痛尤妙在籲懇 明旨事定回京目
前係託空詞當可邀允甯附片按 啟鑒日期必須有
此補筆現聞各國有謀保定漢口兩路進兵之說想停
戰約內必有請 回鑾一節如不准難保不偪成分裂
此奏所關匪細宣去冬亦有密摺請經營陪都然非所
論於今日請慰帥附列賤名奎帥綽帥善帥均願列銜

寄濟南袁中丞

閏八月十二日

本使震電有人密告俄德兵赴京南與袁軍相近將擬排戰藉口以攻山東現款局漸近如果開則和議頓罷請速電慰帥斟酌飭各軍少避勿輕戰以保大局等語乞酌奪云

俄京楊星使電奏

閏八月十二日由滬轉西安端中丞代奏

恭讀屢頒諭旨仰見聖主引咎懲罪顧重邦交維持和局薄海翕然儒迭次催詢外部請俄主及時排解迅速開議以副國書敦託之意據外部稱如中朝真心和好便易効力惟聞有遷都西安

之議各國譁然謂此舉若非蓄銳集兵徐圖報復
卽欲閉關固圉斷絕外交恐議和非出至誠善後
必多棘手惟望 車駕還宮誠心修好兵戈待息
商議不難等語儒數月來私窺各國意旨均願保
和不欲生事俄尤始終如一近日 朝政中外感
動推誠布公正可早圖了事指日還蹕決不驚犯
車塵若果西幸將疑我別有隱情非特議結無期
尙恐激成變局或併力西向直逼咸陽或蔓延南
疆分據海岸其爲禍何堪設想況久延和議則大
局益不可支自踣偏安在各國更爲得計姑無論

神京壇廟委棄痛心長安宮庭經營匪易也 朝
廷所以出此計者祇以彼軍驟難深入穀函可冀
暫安不知庭戶與人豈能自固堂奧 乘輿遠引
勢必久踞京師且和議一日不成人心一日不定
宗社一日不安自困自危莫此爲甚伏乞
聖明熟思審察速罷西遷以息羣疑而挽時局迫
切上陳無任惶悚請代奏